

平
津
讀
碑
記

續記一卷

余近年搜藏碑刻頗有出於前編所未見者今並作續記附於後嘉慶廿一年三月十七日臨海洪頤煊識於羊城官舍

周

比干墓題字

右比干墓題字在汲縣比干墓上相傳以爲孔子書據水經注朝歌縣牧野有殷大夫比干冢前有石銘題隸云殷大夫比干之墓今本作殷比干墓四隸字墓字下半已泐又是後人摹刻隸續所載卽是此本

北齊

文殊般若經碑

右文殊般若經碑在寧陽縣水牛山書作十行行三十字前後俱無年月碑額作文殊般若四字寰宇訪碑錄繫於北齊末今從之

隋

觀世音普門品經

開皇十三年二月

右觀世音普門品經在曲陽縣碑作大隸字末題大隋開皇十三年二月八日刊上有行唐邑龕四字

安喜公李使君碑

開皇十七年二月

右安喜公李使君碑在乾州馬嵬堡北五里碑字多殘泐此拓本觀金石萃編本多辨十餘字石壘鐫華

云使君涼武昭王之後祖景超員外散騎侍郎父通
逸使持節東南道都督狄道縣開國子季父炎之出
牧荊郡今拓本祖景超父口逸季父炎之字猶可辨
炎之魏書有傳新唐書宰相世系表李氏武陽房出
自興聖皇帝第七子豫興聖皇帝卽涼武昭王也表
豫止有孫炎之字口珍後魏兼侍中文簡公則使君
當爲涼武昭王曾孫與唐爲同宗惜表不詳其名

太僕卿元口墓誌銘

大業十一年八月

右太僕卿元口墓誌銘近時新出土劉吉甫以拓本
贈余據誌君諱口字口智河南洛陽人魏昭成皇帝
之後其名字已泐又云六世祖遵假節侍中撫軍大

將軍尙書左僕射冀青兗豫徐州諸軍事冀州牧常
山王高祖素假節征西大將軍內都大官常山康王
會祖忠使持節鎮西大將軍相太二州刺史侍中尙
書左僕射城陽宣王祖暕使持節散騎常侍都督徐
州諸軍事平東將軍徐州刺史宗正卿父最使持節
侍中驃騎大將軍開府儀同三司尙書左僕射華敷
南秦并幽晉六州諸軍事六州刺史司徒公樂平愼
王以魏書昭成子孫列傳攷之其系次官階皆相合
忠城陽宣王傳作城陽公暕傳作壽興當是其字因
避諱而改稱唯不言爲宗正卿誌稱君周保定四年
詔擢爲左給事中士建德五年遷爲司御上士宜政

元年封建寧縣男大象二年進爵爲子尋遷少駕部
下大夫開皇元年出爲益州武康郡太守又進爵爲
伯轉爲儀同三司九年授使持節扶州諸軍事扶州
刺史十六年改授渝州諸軍事渝州刺史更授夷陵
太守入爲太僕卿叙其官階最詳元和姓纂壽興少
子勗司徒樂平王生亶亶生文豪太僕少卿勗卽最
字之譌亶不言爲太僕卿未知卽其人否

海陵郡公賀若誼碑

右海陵郡公賀若誼碑在興平縣學宮碑字多泐賀
若本雙姓故碑額題作賀若使君碑祖伏連襲爵安
富公雲州刺史父統右衛將軍散騎常侍元和姓纂

賀若作賀蘭又稱遠祖達羅安樂王達羅統生敦周
金州總管武都公誼隋靈州刺史海陵公隋書賀若
誼有傳北史誼附在賀若敦傳又賀若弼據姓纂敦
生弼隋揚州總管宋公金石萃編以弼爲誼之兄誤
也

唐

宗聖觀記

武德九年二月

右宗聖觀記在盤屋縣南史記周本紀麋鹿在牧蜚
鴻滿野周書度邑解作夷羊在牧飛鴻滿野此碑稱
夷羊在牧飛蜚滿野益本于周書淮南本經訓作飛
蜚滿野高誘註蜚蠃蠓之屬一曰蝗也皆同聲假借

字

蜀王師蓋文達碑

貞觀十八年

右蜀王師蓋文達碑在衡水縣文達兩唐書俱在儒學傳蜀王太宗第六子愔舊唐書文達傳貞觀十三年除國子司業俄拜蜀王師以王有罪坐免碑云十二年詔授國子司業十三年詔授兼蜀王師十六年丁母憂於是逍遙誓諾每服止足之言退居上筮有終焉之心不言其因蜀王免官或碑諱言之碑文達字藝成大業三年授同安博士九年除國子助教兩唐書本傳俱不言

贈比干太師詔并祭文

貞觀十九年二月

右贈比干太師詔并祭文在汲縣新唐書太宗本紀
貞觀十九年二月庚戌如洛陽宮以伐高麗丁巳贈
比干太師謚忠烈舊唐書本紀作贈殷比干爲太師
謚曰忠烈命所司封墓葺祠堂春秋祠以少牢上自
爲文以祭之碑詔下日字已泐祭文作二月廿日戊
午是丁巳下詔贈比干太師命所司封墓葺祠次日
始爲文以致祭比干也碑原石久佚此爲元延祐五
年重刊本金石萃編所收僅有祭文此拓本尙完

曲阜憲公孔穎達碑

貞觀二十二年

右曲阜憲公孔穎達碑在醴泉縣碑已殘泐可辨字
無幾以新唐書本傳攷之官階俱與碑合唯碑稱貞

觀四年加員外散騎常侍口太子中允本傳不載奉
勅口撰五經義疏本傳作義訓

晉州刺史殘碑

右晉州刺史殘碑在醴泉縣碑字摩滅不甚可辨第
六行有河東郡三字第七行有金積二字第九行有
浴德二字第十行有河仰絳紗而摩六字第十六行
有授晉州總管五字第廿行有河東柳氏隨五字關
中金石記以爲卽裴藝碑褚遂良書

石鼓尊勝經幢

右石鼓尊勝經幢在醴泉縣前後俱漫滅耶字注余
何反縛字注父何反此亦未改反作切之一證

汾陰獻公薛收碑

永徽六年八月

右汾陰獻公薛收碑在醴泉縣碑殘泐存字無幾收薛道衡子新唐書本傳以父不得死於隋不肯仕郡舉秀才不應碑云舉以孝廉口而不就似卽指其事唯作孝廉與史異耳

處士張興墓誌銘

龍朔元年十月

右處士張興墓誌銘諸家皆未著錄據碑君諱興字文起南陽西鄂人曾祖瓘魏冀州信都縣令祖皮周太僕寺主簿轉授瀛州河間縣令父才隋揚州江都縣丞處士以貞觀廿二年七月廿七日葬春秋六十有二夫人趙氏葬於水徽四年春秋六十以龍朔元

年歲次辛酉十月癸亥朔廿三日乙酉合葬故鄴城西八里舊唐書地理志隋南陽郡武德二年改爲鄧州天寶元年改爲南陽郡又所領無西鄧縣惟向城下云漢西鄧縣地屬鄧州後魏於古向城置縣乃改立誌稱南陽西鄧人是舉其舊望也皮卽虔字闕筆

同州聖教序

龍朔三年六月

右同州聖教序在同州末題龍朔三年歲次癸亥六月癸未朔廿三日乙巳建大唐緒遂良書在同州倅廳舊唐書緒遂良傳永徽元年出爲同州刺史三年徵拜吏部尙書同中書門下三品顯慶二年貶愛州刺史明年卒官此碑立於龍朔三年時遂良歿已六

年龍朔三年是其建碑年月非書碑年月也

贈秦師孔宣公碑并陰

乾封元年

右贈秦師孔宣公碑在曲阜縣孔子廟碑稱兗州都督霍王元軌元軌爲高祖第十四子兩唐書俱不言其爲兗州都督以碑攷之當在加位司徒出爲襄州刺史以前碑陰武德九年詔一乾封元年詔一太子弘表一乾封祭文一末題儀鳳二年七月訖功祭文有司稼正卿扶餘隆元和姓纂百濟國王夫餘寬生璋號帶方郡王生義慈大唐拜帶方郡王金紫光祿大夫貞觀入朝生隆熊州都督姓纂以扶作夫當以碑爲正

鄭惠王造石塔記

咸亨四年十月

右鄭惠王造石塔記在長子縣鄭惠王者高祖第十
三子元懿也碑王諱字下俱闕書新唐書本傳王有
十子碑後列十子唯第五王子樂陵公闕其名以宗
室世系表證之樂陵公名球表脫第六王子武安公
琨碑嗣鄭王郢州刺史璫表作遂州刺史璜又呂國
公琛表闕琛字樂平公珪表作樂安皆當以碑爲正

龍龕巖道場銘

聖歷二年正月

右龍龕巖道場銘在羅定州龍龕巖翁覃谿閣學與
東金石略龍龕巖有唐張柬之石刻余五按瀧江屢
訪而不能得歲乙亥頤煊署羅定州判區之藩茂才

揚贈乃是此銘銘前題冠軍大將軍行左豹韜衛將軍上柱國潁川郡開國公陳集原撰約一千四百餘字銘內並無張柬之字豈閣學傳聞之譌抑尚有張刻而茂才失揚邪按銘龍龕巖因龍蛻得名武德四年永寧縣令陳普光因立道場上元年男叔瓊造立當陽連壘尊像善勞縣令叔珪更於道場之南造釋迦尊像因勒此銘銘後題大檀越主孫登仕郎守賓州錄事參軍上騎都尉惠感勸學主從孫前檢校州孟陵縣令靈托都檢主從孫前掾陵州烏律縣令羅積皆陳氏子姓新唐書地理志瀧州建水縣武德五年曰永寧天寶元年更名卽今羅定州地梧州孟陵

縣貞觀八年更名善勞縣屬黨州賓州貞觀五年置
皆屬嶺南道唯撫陵州烏律縣地理志不載無攷

蒲州虞鄉縣令劉行忠碑

開元三年正月

右蒲州虞鄉縣令劉行忠碑在永濟縣碑稱行忠樹
幡竿於栢梯山寺之西南岑寺都維那法泰上人爲
予傳之元和郡縣志壇道山一名百梯山在虞鄉縣
西南十二里山高萬仞躋攀者百梯方可升降故曰
百梯據此碑作栢梯則其說非矣碑不題撰人姓名
又第一行上題唐蒲州虞鄉縣令劉君幡竿銘并序
下題朝議郎行虞鄉縣令劉行忠碑亦變例

處士胡佺墓誌

開元三年十月

右處士胡仝墓誌在介休縣祖買隋孝廉父端不仕處士字尙真安定人卒時春秋七十以開元三年歲次乙卯十月廿五日癸酉遷窆于介休縣東廿四平原書法絕工不題書人名氏

有道先生葉國重碑

開元五年二月

右有道先生葉國重碑李邕書原石久佚此爲後人重刻本又別見一本字體龕拙不足觀國重爲葉法善之祖新店書葉法善傳云開元八年卒或言生隨大業丙子此碑立于開元五年時法善已百二歲故碑云雖暮景急節而純孝孔彰是獻封章願拜墳墓者此也

李文安石浮圖銘

開元十年四月

右李文安石浮圖銘在房山縣雲居寺文安結銜稱
易州新安府折衝新唐書地理志易州有新安府末
題易州前遂城縣書助教梁高望書新唐書百官志
書學助教一人掌教八品以下及庶人子爲生者

玉泉寺大通禪師碑

右玉泉寺大通禪師碑在當陽縣禪師諱神秀姓李
氏舊唐書有傳稱神秀以神龍二年卒有詔賜諡曰
大通禪師岐王範張說及徵士盧鴻一皆爲其碑文
此碑卽說所撰也碑後半已殘泐前半完好大略如
傳所言

娑羅樹碑

開元十一年十月

右娑羅樹碑在淮安府治題海州刺史李邕文并書
原石久佚此爲明人重刻本前後無題識錢辛楣少
詹云明隆慶壬申沔陽陳文燭知淮安府得舊榻本
重刻于郡齋陳所得者裴界之本卽用橫石刻之故
行款皆失其舊此本正與之同據金石萃編陳文燭
本有跋此榻本失之

少林寺賜田勅

開元十一年十二月

右少林寺賜田勅在登封縣刻在裴濯少林寺碑陰
金石萃編所收牒後有開元十一年十二月廿一日
并趙冬曦徐堅張說三人銜名此拓本失之牒稱少

林寺僧曇宗志操惠瑒等翻城歸國賜田始末其稱
僞轅州司馬趙孝宰僞羅州縣令劉翁重皆王世充
所授裴濯少林寺碑云寺西北五十里有栢谷墅在
齊爲郡王充僭號署曰轅州轅卽轅字

伯夷叔齊碑

開元十三年正月

右伯夷叔齊碑在蒲城縣首陽山上碑爲邑宰太原
王公所建梁昇卿撰文及書銘末有黃鉞不降志五
字當是碑中脫文故附於末

延州膚施縣令于士恭墓誌銘

開元十五年七月

右延州膚施縣令于士恭墓誌銘在咸寧縣諸家皆
未著錄士恭爲于志寧姪孫以新唐書宰相世系表

攷之表稱謹從西魏孝武帝入關遂爲京兆長安人
碑作五代祖謹仕魏遂居河南今卽河南人也表宣
道隋上儀同威安獻公碑作隋左衛率皇涼甘肅瓜
沙五州諸軍使涼州刺史成安子表威安是成安之
譌祖承寧增建平公表亦不載承寧子表有遂古而
無元祚元祚任益州九隴縣令襲建平爵尙德靜縣
主士恭卽主之次子當以碑補之

北嶽恒山祠碑

開元十五年八月

右北嶽恒山祠碑在曲陽縣舊唐書張嘉貞傳嘉貞
爲工部尙書定州刺史知北平軍事至州於恒嶽廟
中立頌嘉貞白爲其文乃書於石其碑用白石爲之

素質黑文甚爲奇麗卽此碑碑云景寅歲乃命誅才
謬兼軍郡嘉貞於開元十三年左轉台州刺史十四
年遷定州刺史史不言其年者略也碑結銜稍泐兼
定州刺史字猶可辨

山墳石浮屠後記

開元二十八年

右山墳石浮屠後記在房山縣雲居寺新唐書地理
志幽州范陽郡大都督府范陽縣屬涿州記云幽府
范陽縣時縣屬幽州變州稱府亦一例

祠部員外郎裴稹墓誌銘

開元二十九年二月

右祠部員外郎裴稹墓誌銘在長安縣稹字道安其
稹字已磨滅金石萃編拓本猶能辨之稹爲裴光庭

子新唐書宰相世系表穉司勳員外郎襲正平縣子而碑不言碑云嗣子倩表倩字容卿度支郎中正平縣男謚節亦可補碑之闕

般若心經碑

天寶元年四月

右般若心經碑不知所在末題天寶元年四月八日河北道宣慰使朝散大夫守內侍陳令望造額題潁川陳公密多心經碑碑凡十五行新唐書地理志河北道有採訪使而無宣慰使此因事立名以內官爲之

金剛經殘石幢

天寶七載三月

右金剛經殘石幢在西安府城南李家村幢止存二

斷石上截四面而下截四面金石萃編所收本下截八面有寶歷元年并佛弟子太原王口口等題字此拓本無之經前有序題曰蔣圖撰清河張賁書序

靈泉寺玄林禪師碑

天寶八載二月

右靈泉寺玄林禪師碑諸家皆未著錄碑題監察御史陸長源撰書法似李北海而不題書人名氏碑稱禪師諱玄林堯城人也俗性路氏捕虜將軍端見僞後燕錄豫州刺史永出晉中興書元和姓纂石趙有揚州刺史路永當卽其人禪師以天寶五載十二月十日不疾而化春秋九十餘僧臘七十一新唐書堯城縣屬相州陸長源兩唐書皆有傳

雲麾將軍劉威墓誌銘

天寶十二載十月

右雲麾將軍劉威墓誌銘在咸寧縣誌稱父贈南磧
郡司馬新唐書地理志作南溪郡解褐行興州大桃
成主地理志興州下不載大桃成餘寧州彭池府陝
州曹陽府同州襄城府俱見於地理志

內常侍孫志廉墓誌銘

天寶十三載六月

右內常侍孫志廉墓誌銘今在吳縣靈巖山館誌云
終於咸寧縣來庭里之私第內侍高福墓誌終於來
庭里之私第內侍劉遵禮墓誌薨於來庭里私第蓋
當時內官皆聚居於此里誌題朝議郎行陝郡平陸
縣尉申掌構撰元和姓纂丹陽申氏狀稱申不害之

後陳有南徐州申胄八代孫堂構唐虞部員外郎

臨淮王李光弼神道碑

廣德二年十一月

右臨淮王李光弼神道碑在富平縣顏真卿撰張少
梯書碑字多殘泐以魯公集所載碑文補之尙可讀
新唐書宰相世系表光弼本柳城李氏世爲契丹酋
長後徙京兆萬年故本傳稱光弼營州柳城人碑作
京兆萬年人世系表光弼曾祖令節祖重扶父楷洛
其歷官俱與碑同碑重扶作重英重字稍泐英字甚
明又表光弼爲楷洛第三子碑作第四子是表誤

永仙觀田尊師德行頌

右永仙觀田尊師德行頌在富平縣美原鎮碑首行

已殘缺下題內供奉口光書并題額今額尙完好碑
字多漫漶碑稱天寶二載五月廿三日從人之願鬱
起仙宮玄宗至道大聖大明孝皇帝賜額曰永仙觀
後又有中書令汾陽王子儀口章事兵部尙書李口
口中書侍郎元公載黃門侍郎王公綽以新唐書宰
相表證之碑當立于廣德二年李下名闕者李峴也

光祿卿王訓墓誌銘

大歷二年八月

右光祿卿王訓墓誌銘在咸寧縣訓爲王同皎之孫
兩唐書王同皎傳同皎子繇尙永穆公主生子潛而
不及訓碑稱訓永穆大長公主之中子是訓爲繇次
子也新唐書同皎尙中宗第三女安定公主碑作定

安長公主安樂公主傳中亦作定安是作安定者誤也永穆公主玄宗長女碑稱訓尚博平郡主後稱公主郡主疑是其先封史不詳其人

新建文宣王廟碑

貞元五年二月

右新建文宣王廟碑在涿州廟爲貞元五年幽州范陽縣令宋□□所建碑前題皇唐幽州盧龍節度觀察等使工部尚書御史大夫幽州□都督□□□□□劉公新置文宣廟碑新唐書藩鎮盧龍列傳朱滔貞元元年死劉忬乃總軍事俄詔爲節度副大使彭城郡公居鎮纔三月死子濟嗣節度累遷檢校尚書此所稱劉公者乃濟也碑爲韋稔撰張澹

書稔結銜稱幽州觀察判官檢校尚書主客員外郎
兼侍御史稔魏人見朱滔傳

劍州長史李廣業碑

貞元二十年十一月

右劍州長史李廣業碑在三原縣碑稱公之玄孫鐫
今任浙江西道都團練觀察處置及諸口鹽鐵轉運
等使銀青光祿大夫檢校禮部尚書使持節潤州諸
軍事潤州刺史兼御史大夫新唐書李鐫傳大略如
碑所言唯不載銀青光祿大夫檢校禮部尚書兼御
史大夫鐫叛在此碑後四年

蜀丞相諸葛武侯祠堂碑陰

元和四年二月

右蜀丞相諸葛武侯祠堂碑陰在成都府碑陰分四

截第一截題記已摩泐所存字無幾其摩泐處刻明
景泰壬申黃溥李賢詩三首第二截第三截前爲武
元衡銜名自裴堪以下皆其幕官題銜者共二十八
人後復有宋元符庚辰西洛馬中等題字新唐書武
元衡傳元和二年詔元衡檢校吏部尙書兼門下侍
郎同平章事爲劔南西川節度使開府極一時選其
見於題名者柳公綽裴度盧士玫楊嗣復宇文藉兩
唐書有傳裴堪崔備韋同訓裴儉渾鉅俱見宰相世
系表李虛中見韓昌黎所撰墓誌銘晁氏郡齋讀書
志有李虛中命書三卷楊嗣復時爲節度推官大和
九年嗣復爲劔南西川節度使因題記於第四截又

作詩一首和詩楊汝下字泐者當是士字新唐書楊
汝士傳開成初繇兵部侍郎爲東川節度使時嗣復
鎮西川乃族昆弟對擁旄節世榮其門碑題銜正與
傳同

鴈門郡解進墓誌銘

元和五年十一月

右鴈門郡解進墓誌銘在孟縣誌稱疾終於河南府
河陽縣太平鄉樹樓村之私第太平鄉見鄭弘禮妻
李氏夫人墓誌碑修作修孀作霜切作切皆異文

智者大師修禪道場碑

元和六年十月

右智者大師修禪道場碑在天台縣國清寺碑云自
上元寶應之際此邦寇擾新唐書本紀乾元元年八

月辛未台州人袁鼂反廣德二年十一月癸丑袁鼂
伏誅李光弼傳浙東賊袁晁反台州建元寶勝以建
丑爲正月殘剽州縣光弼遣麾下破其衆於衢州廣
德元年遂禽晁浙東平碑所稱寇擾卽其事碑云當
是時得大師之門者千數得深者三十有二人纂其
言施行於後世者曰章安大師諱灌頂新唐書藝文
志僧灌頂私記天台智者詞旨一卷又義記一卷字
法雲姓吳氏章安人

尊勝隨羅尼經幢

元和八年八月

右尊勝隨羅尼經幢在西安府學宮末題大唐元和
八年癸巳之歲八月辛卯朔五日乙未女弟子卹羅

延建尊勝碑打本散施同願受持石臺孝經表謹打
石臺孝經本分爲上下兩卷打本卽搨本

七星巖李紳題名

寶歷元年二月

右七星巖李紳題名在高要縣文云李紳長慶四年
二月自戶部侍郎貶官至此寶歷元年二月十四日
將家累遊舊唐書敬宗本紀長慶四年二月癸未貶
戶部侍郎李紳爲端州司馬是其時所題晉書戴洋
傳初混欲迎其家累北齊書祖珽傳倩珽作書屬家
累事稱家人爲家累亦始見於六朝時

真空寺修石幢記

大和六年八月

右真空寺修石幢記在長安縣題將仕郎試左金吾

衛兵曹參軍張模述并書末有沙子施主王叔渡題
字凡七行

阿育王寺常住田碑 大和七年十二月

右阿育王寺常住田碑在鄞縣碑爲萬齊融撰趙州
刺史徐嶠口書後爲賊盜墮壞大和七年明州刺史
于季友得舊文復屬順陽處士范的書此碑季友記
其後并附與范的倡和詩二首季友尙憲宗永昌公
主拜駙馬都尉兩唐書俱附見其父于頔傳宰相世
系表季友絳宋等州刺史不言明州碑引詩倬彼甫
田甫作碩願賀金錢賀卽捐字

楚州兵曹參軍劉峯墓誌銘 大和八年十一月

右楚州兵曹參軍劉峯墓誌銘在咸寧縣諸家皆未
著錄碑稱峯解褐授洵陽縣丞次任寧國縣丞三任
楚州兵曹以大和八年七月一日逝懷德私第享年
六十有二子歡郎少孤長婿楊氏以大和八年十一
月廿六日塋于長安縣口口鄉碑題進士景琰撰墓
作慕他碑未有

碧落文碑陰

開成二年十一月

右碧落文碑陰在絳州龍興宮碧落文爲李譔書碑
陰記其始末前題黃公記末題開口二年十一月廿
五月絳口長史李漢記新唐書宗室世系表譔封黃
國公碑國作縣字雖泐下半尙可辨舊唐書李漢傳

大和九年六月李宗閔得罪罷相漢坐其黨出爲邠州刺史宗閔再貶漢亦改邠州司馬仍三二十年不得錄用其爲絳州長史史不言開下泐者當是成字

隋羅尼經幢

大中三年正月

右隋羅尼經幢在西安府學宮經後有記題京兆府興平縣縣東北隅隋羅尼幢記處士王鉉撰縣人于惟則奉爲文武百辟當縣宰寮及口界有情敬造未題大中三年己巳歲正月丙辰朔一日建諸家皆釋作二年誤

勅內莊宅使牒

大中五年正月

右勅內莊宅使牒在西安府學宮刻於大達法師玄

秘塔碑陰碑前列勅內住宅使牒首載萬年縣澧川
鄉陳村安國寺金經口壹所計估價錢次列舍間雜
樹地畝數目莊居四至如今之市券後列使兼鴻臚
禮賓等使特進知口口田紹宗副使內府局令賜緋
口口劉行村判官內僕局承彭口等銜名後列僧正
言出錢創造堂內并彩畫兩壁等事當時內住宅使
以內侍爲之劉遵禮亦嘗爲此使

杜順和尚行記

大中六年

右杜順和尚行記在西安府開佛寺集古錄有此碑
記云貞來婦人有一子求之尚書日月逾邁若弗云
來孔冲遠正義云貞卽云也尚書本作貞來說文貞

籀文作鼎漢書匡衡傳無說詩匡鼎來鼎來卽員來
與此碑可相證碑後有鐫玉冊官邵建初刻字圭峰
定慧禪師碑劉遵禮墓誌銘皆邵建初刻

雲居寺主律大德碑

咸通八年十一月

右雲居寺主律大德碑在房山縣碑稱大德姓史氏
涿郡范陽人元和中廉察使相國彭城劉公墓其高
節亟請臨壇又云暨大和有口祀方伯司徒史公之
領戎也常日重山聆風仰德新唐書本紀元和五年
七月乙卯幽州盧龍軍節度使劉濟卒其子總自稱
留後此所稱劉公未知是濟是總又大和八年十月
辛巳幽州盧龍軍大將史元忠逐其節度使楊志誠

自稱權句當節度兵馬碑所稱史公卽其人碑題潛江栖夷子何等撰以號人結銜亦唐末有此

內侍左監門衛大將軍劉遵禮墓誌銘

咸通九年十一月

右內侍左監門衛大將軍劉遵禮墓誌銘在長安縣文云院使親承顧問莫厚於宣徽遵禮以會昌六年六月改充宣徽北院使大中五年改充宣徽南院使宣徽院新唐書百官志不載玉海引實錄云貞元中選樂工三十餘人號宣徽院寶歷中以毬工籍宣徽院宣宗時嚴季實爲北院副使天祐二年宣徽南院北院並停而五代時並置此官宣徽院爲樂工所在故院使以內侍爲之

某君墓誌銘

咸通十一年十二月

右某君墓誌銘在蕭山縣余同年汪厚叔選部以榻
本見贈碑前半已殘泐姓名不可攷稱王父諱旭皇
任斲□□□□府君諱希皇任左武衛率府長史
君實府君第四子也□而好學長而能文尤攻於體
物舉進士亟敗於垂成以□通十年歲次乙丑四月
戊子朔廿二日己酉終于家銘云嗚呼公都碩學鴻
儒公都當是其字碑不題撰人姓名誌云庠嘗射策
春闈竊在下風未知是何姓

碧落文碑側

咸通十口年十月

右碧落文碑側末題咸通十口年十月二日弘農楊

損記楊嗣復子新唐書本傳路巖爲相使損按獄黔
中踰年還三遷絳州刺史題記正其時所作此碑陰
碑側近時著錄家皆未見集古錄金石錄有之

處士戚高墓誌

中和三年十月

右處士戚高墓誌在諸暨縣近時始出土汪厚叔選
部所贈誌撰人題布衣趙玘稱處士諱高字崇景其
先北海郡人遷爲越州諸暨靈泉之里人也以中和
三年歲次癸卯九月甲子朔十九日壬午之辰終於
後流私第冬十月甲午朔廿七日庚申將窆于石解
皇父之塋右壬首之墳原誌稱處士芳壽不或之歲
未昇壯室之年有五處士卒時年卅五

內樞密使吳承泌墓誌

乾寧二年十一月

右內樞密使吳承泌墓誌在咸陽縣誌爲裴廷裕撰
閤湘書廷裕結銜稱翰林學士守尚書司封郎中新
唐書宰相世系表廷裕字膺餘不言歷官可據此誌
以補其闕金石萃編所收本字多漫滅又褻褻前後
失次此拓本尙完善誌云乾符末先皇帝命以本官
充解縣口鹽催勘副使以功賜緋魚袋充解縣催勘
使屬關河失守盜賊驚奔銅池旣口於九衢金根去
狩於三蜀此卽指廣明元年黃巢陷京師僖宗幸蜀
事

台州刺史杜雄墓誌銘

乾寧四年十一月

右台州刺史杜雄墓誌銘在臨海縣南二十里蔡王廟碑已殘泐宋王象之輿地碑目唐文德二年台州刺史杜雄廟碑碑陰有蔡大王廟記卽此碑以嘉定赤城志攷之碑當立于乾寧四年十一月乾隆癸丑秋余始訪得此碑別有考見筠軒文鈔唐昭宗升台州爲德化軍兩唐書地理志不載唯見於此碑今碑前題門吏德化軍巡官前嶺南西道觀察支使試秘書省正字魯洵撰字完好可辨

五代

高麗國原州忠湛大師碑

天福五年七月

右高麗國原州忠湛大師碑余癸酉在都從翁覃谿

閣學假得裝本錄之未有歲戊午三韓洪良浩墨蹟
題跋稱原州靈鳳山半拆碑卽高麗太祖製詞崔光
允集唐文皇書者也萬歷壬辰之亂倭奴車載以東
到竹嶺碑斷爲二乃挈其半而去亂定關東守臣曳
還于原州遂稱半折碑今碑前尙有高麗國原州及
臣崔光允奉教集太宗文皇字可辨鄭麟趾高麗史
太祖世家二十三年秋七月王師忠湛死建塔于原
州靈鳳山興法寺親製碑文所言與良浩跋合碑稱
大師法諱忠湛俗姓金氏以咸通十年正月廿一日
誕生又云五年七月十八日詰旦顏兒如常寂然離
俗年七十有二以長歷攷之是晉天福五年當高麗

太祖之二十三年高麗史崔彥橋傳子光允嘗以賓貢進士游學入晉爲契丹所虜以才見用新舊五代史皆無傳

建雄軍節度使相里金碑

天福五年十月

右建雄軍節度使相里金碑在汾陽縣新五代史有相里金傳以碑攷之傳金字奉金并州人碑作字國寶汾州西河縣人傳事晉王爲五院軍隊長梁晉戰栢鄉胡柳皆有功而還遷黃甲指揮使碑作後口莊宗皇帝上黨解圉栢鄉得僞擢公白副兵馬使充匡衛指揮使後於胡柳陂獻捷德勝寨成功轉右帳前指揮使傳卒贈太師碑作贈太子太師又碑所載金

官勲甚詳應順元年二月改保義軍節度陝虢等州
觀察處置等使加金紫光祿大夫檢校司徒陝州大
都督府長史上柱國西河縣開國男食邑口百戶天
福元年改授建雄軍節度使晉隰等州觀察處置等
使加光祿大夫檢校太傅使持節晉州諸軍事行晉
州刺史西河郡開國侯食邑一千戶三年四月加檢
校太尉食邑一千三百戶傳皆不載碑述相里氏得
姓之由與元和姓纂同訪碑錄以此碑爲李相撰諦
視李下當是穀字

父母恩重經

乾祐三年

右父母恩重經在寧陽縣首行題大漢國兗州龔丘

縣萬歲鄉剛城村孤子孟知進□□願爲□三代先
亡及父母造□石一所及妻李氏同意發願□碑額
題乾祐三年□□□□□□孤子孟進□疏記省
知字太平寰宇記故剛城漢爲剛縣廢城在今龔丘
縣東北村當以此得名

新羅國石南山國師碑銘後記

顯德元年七月

右新羅國石南山國師碑銘後記余從翁覃谿閣學
假得裝本錄之據記大師于唐新羅國景明王之天
祐年中化緣畢已門生金長老允正修錄門人崔大
相仁澆撰碑後門下法孫釋純白復述此記末題顯
德元年歲在甲寅七月十五日立據高麗史新羅景

王魏磨以天成二年爲甄萱所弑立王表弟金傳爲王清泰二年新羅王金傳降于高麗除新羅國爲慶州顯德元年當高麗光宗之五年記稱仁浣者辰韓茂族人所謂一代三崔金榜題廻曰崔致遠曰崔仁浣曰崔承祐可爲崔氏增一佳話

崇化寺西塔基記 顯德五年七月

右崇化寺西塔基記在蕭山縣文云吳越王長舅吳延福誠興塲塔二所香泥木石爲此鎡基厚二丈餘其固若山他日剝爲請無疑也唐下元戊午年七月二十八日勾當并結塔僧契庄勸緣僧延祝稱唐下元者以遯甲之術冠之蓋亦嫌用中朝年號實周顯

德五年其所稱吳越王者是錢俶也

栖巖寺舍利塔殿記

顯德六年九月

右栖巖寺舍利塔殿記在蒲城縣題節度掌書記將仕郎試大理司直李瑩撰張靄書記云丙辰秋八月詔今府上太尉移北庭節度鎮於蒲未行題輸忠保節功臣河中護國軍節度管内觀察處置等使光祿大夫檢校太尉行河中尹兼御史大夫上柱國清河郡開國侯食邑一千戶張鐸建舊五代史本紀顯德元年涇州張鐸加檢校太尉顯德三年八月壬戌張鐸移鎮河中顯德六年八月河中節度使檢校太尉張鐸並加階爵此卽其人兩五代史無鐸傳

尋陽公主墓誌銘

乾貞三年三月

右尋陽公主墓誌銘在江都縣公主爲吳楊行密之女碑前題有吳太僕卿檢校尙書左僕射舒州刺史彭城劉公夫人故尋陽長公主誌中不載劉公之名公主長子曰匡祚受鎮南軍節度討擊使撫州軍事押衙銀青光祿大卿檢校國子祭酒兼侍御史上柱國次曰匡業試秘書省校書郎俱不見於史

雲門山匡聖大師碑

大寶七年四月

右雲門山匡聖大師碑在乳源縣大師諱文偃姓張氏吳越蘇州嘉興人新唐書地理志嘉興縣屬蘇州吳越時沿用其舊碑稱高祖天皇大帝者是劉龔稱

中宗文武光聖明孝皇帝者是劉晟也

吳越造塔殘記

右吳越造塔殘記在錢唐縣記僅存石一塊趙寬夫
茂才得於西湖寶叔塔土中定爲吳延爽所作文云
爽爲觀此山上承角亢咸淳臨安志吳越王錢氏號
此山爲壽星寶石山角亢壽星之次山之得名以此
又云第一級圖八會功德像吳越備史武肅王建八
會亭以平吳定越講武計議凡八會於此此其像之
所由名

讀碑記再續一卷

臨海洪頤煊

夏

峒巉山銘

右峒巉山銘在衡山縣宋嘉定中何致子一自言親至碑所模刻其文於嶽麓書院厥後楊用修楊時喬潘鑑輩遞相摹刻此本則康熙中毛會建刻於西安有跋在碑後此碑非籀非篆當是宋人附會韓愈峒巉山劉禹錫寄呂衡州諸詩所撰本不足存姑以其相沿旣久錄之

漢

萊子侯碣

王莽天鳳三年二月

右萊子侯碣在鄒縣近時新出土孔荃溪儀部以拓本贈余文云始建國天鳳三年二月十三日美子侯爲支人爲封使脩子食等用百余人後子孫母壞取來字漢碑多作來李翊碑太守東萊此作美又其變體脩字諸家多釋作偁字書無此字諦視上一點是泐痕字當作脩疑是儲字之省取卽敗字據此碣王莽廢孺子嬰自立爲皇帝更漢曰新稱始建國元年以虛示不改元之義故至天鳳改元猶以始建國冠之隸釋載韓玉汝家有一銅料其銘云新始建國天鳳上戊六年紹興中郭浩知金舟得一鉦其銘云新始建國地皇上戊二年其

紀號正與此碣相同

昆弟造冢刻石

建初元年

右昆弟造冢刻石在會稽縣近吳荷屋方伯始訪得之
文云昆弟六人共買山地建初元年造此冢地直三萬
錢上有大吉二字俱摩厓隸書造卽造字省口冢作呆
卽篆變爲隸之始漢人造作必紀其所直之數如武氏
石闕銘造此石闕直錢十五萬作師子直四萬皆其風
俗然也

西嶽華山廟碑

延熹八年四月

右西嶽華山廟碑在華陰縣西嶽廟嘉靖三十四年地
震碑毀今海內所傳拓本止有三本一王無異本是明

萬歷中華陰東肇商雲駒兄弟所藏後贈郭宗昌允伯
國初時歸王宏撰無異今歸朱笥河學士余癸酉在
京師學士嗣君少白刺史曾以示余一商邱宋牧仲本
是顧南原所從雙鉤者今歸 成邸一天一閣本是全
謝山鮎埼亭集所載豐氏萬卷樓本今歸阮尙書北湖
祠塾卽此本是也此本碑文完整未翦篆額左右有李
德裕崔知白李商卿張嗣慶崔璿王式裴謂等題名下
有宋元豐中王子文題字尙書有重摹本首四行闕處
補刻歐陽文忠墨蹟集古錄跋尾

車騎將軍馮緄碑

永康元年十二月

右車騎將軍馮緄碑在渠縣原石久毀此是宋人得舊

拓本重刊碑後有崇寧三年三月初五日厯下張稟後
序并刊碑人銜名馮緄後漢書有傳其遷除先後事迹
舛錯與碑異者隸釋金石錄已舉其失隸釋遭直荒亂
今碑作通直坐正法作左校碑作任左校既來歸葬碑
作遷葬有桓桓烈缺之姿碑作烈烈治春秋嚴韓詩倉
氏碑作食氏漢書儒林傳趙子河內人也事燕韓生授
同郡蔡誼誼授同郡食子公與王吉食生爲博士由是
韓詩有王食長孫之學今本隸釋改作倉氏者誤也此
碑諸家俱未見阮賜卿公子以所藏拓本示余始得錄
之

嘉平石經殘字

嘉平四年三月

右熹平石經殘字六種皆近人重摹本尙書般庚一段
洪範一段君奭一段詩魏風一段唐風一段儀禮大射
儀一段聘禮一段公羊隱四年傳一段論語爲政一段
微子一段堯曰二段篇末一段諸家所摹雖多寡不同
皆不出於此數余所見最舊者則有孫退谷研山齋所
藏宋越州石氏博古堂帖摹本尙書般庚一段論語爲
政一段堯曰一段般庚末有凶德綏績四字爲諸本所
無研山齋本近歸孫淵如觀察當時有人持此帖來售
尙有吉日癸巳集漢隸千文二種皆博古堂帖中所有
此尤出於越州石氏本確證阮尙書所藏石經尙書一
段論語二段亦是此本某上舍稱爲蓬萊閣所刻則謬

也

小黃門譙敏碑

中平四年七月

右小黃門譙敏碑裝本余得於粵東舊家隸釋有此碑
闕二字兩漢金石記據黃小松司馬所藏重刻本謂譙
審優遊下似是氏字喪亡上似是乃字此本優遊下是
昆字喪亡上是其字碑末題中平四年七月十八日癸
卯造翁氏謂是年七月丙戌朔癸卯是十八日無疑據
重刻本以訂今本隸釋廿八日之譙此本亦作十八日
惟顧南原隸辨本於婁機字原其所摹譙敏碑二十四
字必是宋時搨本如真權嗟深冗韞隩儼等字皆與此
本筆畫少異此碑隸釋本闕二字此本不闕且極分明

豈此本能在隸釋本前邪或云是近人偽造今姑存之

仙人唐公房碑陰

右仙人唐公房碑陰兩漢金石記額暈三重內有八分書數行隱隱略辨公房二字又其右下露出一山字餘皆泐不可見此拓本諦視額暈旁尙有元字從字國字司謁字題名第二行有處士南鄭祝口字子華字可辨

大風歌碑

右大風歌碑在沛縣首題漢高祖皇帝歌詞與史記漢書同相傳爲漢曹喜書歐趙俱未著錄元大德間摹刻於石今依金石萃編附於漢末

梁

瘞鶴銘

天監十三年

右瘞鶴銘在丹徒縣焦山麓江中康熙甲午陳太守鵬年募工挽曳出水置觀音菴此拓本止七十九字尙是未出水以前所拓又有一本筆畫稍縱與張力臣圖辨本字數相同是後人重摹不足存

後魏

凝禪寺造三級浮屠碑

元象二年二月

右凝禪寺造三級浮屠碑在元氏縣陸劭文孝廉以拓本見遺碑上截記趙居士名融字珣和元氏人遠祖口漢司徒公征東將軍都督內外諸軍事冀州刺史趙郡公居士融卽共長兄浮陽太守文口元氏令文口邯鄲

令武奴元氏令靈和防子令靈宣長兼參軍□□兄弟等造三級浮齒凝禪寺始末魏書官氏志都督內外諸軍事從第一品四征將軍第二品二大二公司空皇子第一品將軍第二品將軍蕃王俱有長兼行參軍在第八品以下此不知所授在何品也下載載人名其結銜稱博陵太守華陽太守鄉郡太守襄城太守俱見地形志安戲令卽安喜深翟令卽深澤是俗書非改名也北齊

劉碑造像

天保八年

右劉碑造像在洛陽縣說嵩稱豫州劉刺史碑北齊天保八年丁丑直刻劃佛像文列上方刺史名碑無佛處

鐫諸人姓名此拓本止有上層其立碑年月并刺史結銜諸人題名當在下層搨者失之

比邱尼圓照等造像

武平六年五月

右比邱尼圓照等造像在慶雲縣文云大齊武平六年歲次己未五月甲寅朔廿六日己卯佛弟子比丘尼圓照圓光姊妹二人爲亡妣亡兄朱同敬造雙彌勒立石象一軀云云記後頌云峨峨玉象妙飭幼玄石亦可稱爲玉也

許始等造像

右許始等造像在蘭山縣碑額大穿孔旁有佛像四下層題名第五行有北龕大像主兩菩薩并光明主許始

妻成公嬖妃息洪進妻諸葛居家眷屬又有大都維那
許氏大中正王萇法義許洪進等字餘多摩滅不可辨
韋子深等造像

右韋子深等造像在鄒縣殘石題名分爲三列第一列
有韋子深像主韋太陽等字訪碑錄稱韋子深等造像
四面碑此僅有其一面

隋

畢子義等造像

開皇六年四月

右畢子義等造像不知所在碑文摩滅上截有隋開皇
六年歲在丙午四口敬造碑像一口可辨下截邑子題
名有畢子義畢明論等字或云卽訪碑錄石佛寺造像

記有碑陰碑側此拓本失之

龍藏寺碑

開皇六年二月

右龍藏寺碑在正定府城龍興寺碑云太師上柱國大威公之世子使持節□武衛將□□開府儀同三司恒州諸軍事恆州刺史鄂國公金城王孝儒錢辛楣少詹攷定爲王傑之子周書王傑傳金城直城人宣帝卽位拜上柱國追封鄂國公諡曰威子孝仙大象末位至開府儀同大將軍周書傳末亦有載及隋官此不言開皇六年爲恆州刺史者略也仙字古作僊僊又僊之變體

周驃騎將軍鞏賓墓誌銘

開皇十五年十月

右周驃騎將軍鞏賓墓誌銘在武功縣賓字客卿張掖

永平人隋書地理志張掖郡張掖縣舊曰永平後周置
張掖郡開皇初郡廢十七年縣改爲酒泉大業初改爲
張掖誌稱曾祖澄後涼召拜中書侍郎建威將軍玉門
太守屬涼王無諱擁戶北遷乃與燉煌公李保立義歸
誠魏太武皇帝深加禮辟授使持節大鴻臚散騎常侍
高昌張掖二郡太守封永平侯贈涼州刺史魏書李寶
傳世祖遣將討沮渠無諱於敦煌遣弟懷達奉表歸誠
世祖嘉其忠款遣使授寶使持節侍中都督西垂諸軍
事鎮西大將軍開府儀同三司領護西戎校尉沙州牧
敦煌公所言與誌合而澄名不見於史

李鍾葵造像

開皇十六年四月

右李鍾葵造像文云大隋開皇十六年歲次丙辰四月
癸未朔八日庚寅青信仕佛弟子李鍾葵妻馬伶爲亡
女菡妃敬造觀世音石像一軀願亡者生天現存受福
六朝人多以鍾葵爲名及字見顧氏日知錄此李鍾葵
又是一證

鳳泉寺舍利塔下銘

仁壽元年十月

右鳳泉寺舍利塔下銘在扶風縣文云維大隋仁壽元
年歲次辛酉十月辛亥朔十五日乙丑皇帝普爲一切
法界幽顯生靈謹於岐州岐山縣鳳泉寺奉安舍利敬
造靈塔太祖武元皇帝明皇太后皇帝皇后皇太子諸
王子孫等并內外羣官爰及民庶口道三塗人非人等

生生世世值佛聞法永離苦因同口妙果此與青州舍利塔下銘年月日並同當是同時頒造爲三十州之一銘文亦同唯青州舍利塔下銘五字在前此在銘後又無書人并勅使人銜名爲異耳此余同邑宋碯山孝廉宰扶風以拓本見遺碯山好古多聞旋即下世錄之不足勝三歎

太僕卿夫人姬氏墓誌

大業十一年八月

右太僕卿夫人姬氏墓誌在大興縣夫人與太僕卿元君以大業十一年八月廿四日同時合葬於大興縣某鄉某里元君墓誌已著錄夫人姓姬曾祖懿魏使持節驃騎大將軍東郡口公祖亮魏使持節大將軍開府儀

同三司燕州諸軍事燕州刺史東郡敬公父肇周使持
節侍中驃騎大將軍開府儀同三司光祿大夫東秦州
諸軍事東秦州刺史勳晉絳建四州諸軍事勳州總管
神水郡開國公魏書唯姬澹附見衛操傳餘姬氏俱不
見於史隋書地理志絳郡稷山縣有後周勳州置總管
後改曰絳州長平郡舊曰建州開皇初改爲澤州又延
安郡臨真縣有西魏神水郡後周郡廢

唐

化度寺邕禪師舍利塔銘

貞觀五年十一月

右化度寺邕禪師舍利塔銘在長安縣宋景濂潛溪集
歐陽信本書在唐許爲妙品而行於南北者惟僧邕塔

銘而已銘文多所翻刻南本失于瘦北本失于肥此本不知何時重摹文字刪脫不可句讀

濮州濮陽縣令于孝顯碑

貞觀十四年十一月

右濮州濮陽縣令于孝顯碑在三原縣碑稱孝顯字犀角河陰河南人曾祖提魏孝文授以征北將軍隴西太守周加使持節太傅柱國大將軍建平郡開國公祖瑾周太師三老尙書右僕射柱國燕國公諡曰文父禮周使持節大候正大將軍趙州刺史安平郡開國公以周書于謹傳考之傳于謹碑作瑾傳河南洛陽人碑作河陰河南人傳提昭太保碑作太傅餘俱與傳同孝顯以隋開皇十三年起家授右親衛俄而告歸義寧元年入

唐補左武侯錄事叅軍又授元帥府鎧曹叅軍騎都尉
武德四年授雍州錄事叅軍貞觀元年授朝議郎行濮
州濮陽縣令十年四月四日卒於濮陽官舍春秋六十
四燕國公九子新唐書宰相世系表止載三子而不及
禮故無孝顯名

孟法師碑

貞觀十六年五月

右孟法師碑金石錄云岑文本撰褚遂良正書此近人
重摹本有王弁州跋稱首脫唐京師至德觀主八字尾
脫年月銜名三十三字碑叙脫百餘字詞脫二十七字
庚子銷夏記褚遂良孟法師碑舊石完好斷落僅二三
字傳世極少人鮮見者余得之故太保吳國華家當別

手系一
是一本碑稱法師俗姓孟氏諱靜素江夏安陸人隨高祖徵赴京師居至德觀以貞觀十二年七月十二日遺形而化春秋九十有七

晉祠碑陰

貞觀二十年正月

右晉祠碑陰在太原府晉祠銘已見前此碑陰長孫無忌以下七人皆是其從行諸臣以新唐書宰相表證之長孫無忌蕭瑀李勣張亮馬周結銜俱同楊師道十九年十一月丁亥貶爲工部尙書此稱太常卿當是其十一年後再貶也表二十年三月丁丑亮誅四月甲子瑀罷太子太保皆在三月己巳車駕還京之後

桂州善興寺舍利塔銘

顯慶四年四月

右桂州善興寺舍利塔銘在臨桂縣李郎中秉綬家文
云維大唐顯慶二年歲次丁巳十一月乙酉朔十三日
丁酉於桂州城南善興寺開發建立此妙塔七級聳高
十丈至顯慶四年歲次己未四月丁未朔八日甲寅葬
佛舍利貳拾粒束去大江三十餘步舍利鎮寺普共法
界一切含識永充供養故立銘記元和郡縣志桂江一
名灘水經縣東去縣十步楊僕平兩越出零陵下灘水
卽謂此也

衛尉少卿息豆盧遜墓誌銘

顯慶四年八月

右衛尉少卿息豆盧遜墓誌銘在長安縣誌稱遜太祖
武皇帝之外孫太宗文皇帝之甥曾祖通洪州總管沃

野公諡曰安其祖父名泐通見隋書豆盧勣傳新唐書
公主傳高祖女長沙公主始封萬春下嫁豆盧寬子懷
讓宰相世系表通子寬禮部尙書芮定公寬子懷讓表
不言爲駙馬都尉衛尉少卿者略也遜爲懷讓第三子
卒時春秋一十有七未授官因以其父官繫之

雷大岑造像

龍朔元年七月

右雷大岑造像在長安縣前半節錄大唐三藏聖教序
十四行行十字字句多刪落後半記造像字多泐不可
辨末題龍朔元年歲次辛酉七月甲子朔廿三日丙辰
成佛弟子雷大岑皆界行正書

襄邑縣君宋氏夫人墓誌

龍朔

右襄邑縣君宋氏夫人墓誌在長安縣結銜稱大唐故
冠軍大將軍代州都督上柱國許洛仁妻襄邑縣君宋
氏夫人墓誌洛仁碑已見前碑額題大唐故□□大將
軍代州都督許公之碑與此誌結銜正同洛仁以龍朔
二年薨春秋八十有五夫人卒年春秋九十有九洛仁
陪葬昭陵夫人窆於龍首原誌不詳其薨年今姑附於
龍朔之後墓誌作墓誌他碑未見

菩提樹髮塔記

儀鳳元年四月

右菩提樹髮塔記在南海縣光孝寺記稱梁天監元年
有梵僧航海而至自西竺持來菩提樹一株植於戒壇
前今能禪師與宗法師說無上道爲師祝髮於菩提樹

下法才建茲浮圖末題儀鳳元年歲次丙子吾佛生日
原石久毀此明萬厯壬子重摹本

上護軍龐德威墓誌銘

垂拱三年十一月

右上護軍龐德威墓誌銘在咸陽縣德威字二哥南安
人往以三韓未附鯁鯁驚波九種猶迷鼉津駭浪公荷
霜戈而奮武揮星劍以臨戎勇若鯁諸捷如慶忌遂授
公勳官上護軍酬勞効也顯慶龍朔間高麗用兵德威
當與其役

宣州刺史陶府君德政碑

永昌元年二月

右宣州刺史陶府君德政碑在當塗縣何夢華上舍以
拓本見示碑前數行字多摩滅上有宣州刺史陶府君

德政之碑篆額十一字錢辛楣少詹云以寶刻類編證之知府君名大舉撰文者僧靈廓書之者陶德甄也諦視碑前尙有祖諱昱梁衡山郡太守父諱瓚梁著作隨西河司功皇朝滄州清池縣令介州司馬上柱國丹陽縣開國公字可辨大舉自總章元年至垂拱四年厯廓渭洮鄯許秦始梁恆宣相口十二州刺史加銀青光祿大夫丹陽縣開國侯皆有詔褒獎可謂善於其職矣以弘道元年授使持節宣州諸軍事守宣州刺史至垂拱四年轉授相州刺史在宣州凡五年碑爲道士陶口僧道元曇給周元允陶紹真等所立在永昌元年二月十三日其距去宣州任時止二年趙明誠金石錄有唐恆

州刺史陶雲德政碑稱永淳三年此碑授恆州刺史在
調露元年弘道元年轉宣州永淳三年正其在恆州時
寶刻叢編引集古錄目云雲字口舉河南伊闕人然則
類編所稱名大舉者是其字也

普樂寺殘碑

天授二年

右普樂寺殘碑不知所在劉吉甫農部所贈碑止存首
七行上半有普樂寺者天授二年大唐等字大唐二字
跳格書知是唐碑

處士程元景墓誌銘

長壽三年正月

右處士程元景墓誌銘在長安縣元景字師朗京兆長
安人祖恭隋朝議郎行涇州平梁縣令父敬逸唐大承

相府朝散大夫隋書地理志安定郡舊置涇州無平梁縣疑卽原州之平涼時屬涇州也元景隱居不仕以長壽三年歲次甲午丑匝景戊朔九日甲午遭疾終於口賢里是年五月甲午改元延載此在正月故稱長壽三年

夫人袁氏墓碣

聖歷三年正月

右夫人袁氏墓碣在長安縣文云夫生袁氏洛州永昌縣生曾祖君丑梁秘書監太子詹事祖口隨秘書監贈上柱國陽夏縣開口公父大業唐海州郇山縣口以璽厯二準十匝四口疾終於乾封縣太平里第以璽厯三準十匝十五口權殯於長安縣龍首鄉龍首原新唐

書地理志河南府本洛州垂拱四年析河南洛陽置永
昌縣長安二年省京兆府長安縣總章元年析置乾封
縣長安二年省海州胸山縣文作郇山蓋俗字

薛剛墓誌銘

久視元年五月

右薛剛墓誌銘在長安縣剛及祖父俱未仕夫人戴氏
剛終于龍首里第葬于長安龍首原夫人終于懷遠里
第其卒葬年月俱空格誌是其久視元年遷墳合葬時
所書首行下題丹元一詞額題大周薛府君墓誌之銘
九字

巢縣令息尙直墓碣

長安三年

右巢縣令息尙直墓碣在長安縣碣稱直字仁爽清河

郡人呂望之後以調露元年八月逝於郛縣修德里遷
柩於終南山雲居寺禪師林所起塋墳焉末題長安三
年歲次癸卯庚申朔戊辰日外孫弘福寺僧定持建新
唐書地理志巢縣屬廬州此作蘆州是俗字

金州西城縣令息梁嘉運墓誌

景龍三年十月

右金州西城縣令息梁嘉運墓誌在襄陽縣誌稱嘉運
字子安定人也子下似脫一字或讀爲字子安者非地
理志無定縣也嘉運至總章三年歲次庚午三月乙亥
朔廿一日乙酉邁疾終于襄陽縣之私第新唐書高宗
本紀咸亨元年三月甲戌大赦改元此三月廿一日當
稱咸亨元年不當稱總章三年三月朔爲乙亥則甲戌

當是二月皆與史不合

女子唐端墓碣 開元十二年六月

右女子唐端墓碣在咸寧縣端爲殿中少監唐昭之女
卒時春秋十有六新唐書百官志殿中少監從四品上
宰相世系表唐儉曾孫昭河南尹不言爲殿中少監

寧州豐義縣令鄭溫球墓誌銘 開元十五年七月

右寧州豐義縣令鄭溫球墓誌銘在鄂縣誌稱溫球解
褐號州玉城縣丞轉蒲州汾陰尉調補寧州豐義縣令
新唐書地理志寧州彭原縣武德元年以縣置彭州二
年析置豐義縣貞觀元年州廢以彭原豐義來屬開元
八年以豐義隸涇州尋復還屬唐末省溫球卒於開元

十四年時已還屬靈州

秦望山法華寺碑

開元二十三年十二月

右秦望山法華寺碑在山陰縣秦望山天衣寺碑前題
枯州刺史李邕撰并書碑云頃者蒙州刺史前此邦別
乘太原王公名弼夫人武氏起普賢臺一級寫法華經
千部卽普賢臺立法華社有上座正覺寺主道解等相
與言於王公曰願言刻石是用齊山朝散大夫前侍御
史今都府戶曹袁公名楚客負兼濟之雄才託演成之
雅意願慙作者徒使惜然則撰此碑者爲袁楚客非邕
也金石錄此碑作開元二十三年十二月此本作十三
年二月是重摹之譌

多寶塔銘

開元二十九年閏四月

右多寶塔銘不知所在劉吉甫農部以搨本贈余文略云爰有郭楚貞昆弟眷等太夫人李氏自開元七年受持法華經第八金剛觀經尊勝藥師等經每日夜持誦一遍又捨緣身裙帔等數十事造多寶塔一所云云後有建立年月前有多寶塔銘并序六字

隴西縣君牛氏像龕銘

開元

右隴西縣君牛氏像龕銘在洛陽縣龍門金石錄唐龍門西龕像銘禮部員外郎張九齡撰今世所有曲江集無此文惜殘缺不完也今銘前禮部員外郎張九齡文字尙可辨新唐書張九齡傳元宗卽位未郊見九齡建

言俄遷左補闕改司勳員外郎九齡神道碑作禮部司
勳二員外郎則此銘當作於開元初年金石萃編附開
元二十三年後誤也碑云天水趙氏之七子者有罔極
之口又云卽夫人烈考也始口口口趙口又云曰頤貞
曰彙貞案元和姓纂中山趙氏稱本自天水徙曲陽不
器生夏日和璧冬曦安貞居貞彙貞頤貞兄弟七人舉
進士新唐書趙冬曦傳冬曦遷中書舍人以國子監祭
酒卒兄夏日弟和璧安貞居貞頤貞彙貞皆擢進士第
安貞給事中居貞吳郡採訪使頤貞安西都護則牛夫
人者實趙冬曦之母不器之配也碑末云初府君之沒
也長子未冠少男未髫趙氏家世口口又云口口在堂

已六子從政所言皆與史合此碑宋時已殘泐其姓氏
余始攷得之

尊勝陀羅尼神咒

天寶七載五月

右尊勝陀羅尼神咒在長安縣崇聖寺前神咒正書題
天寶七載五月十五日建後有內待主尙客姚承口李
孝忠楊敬順張如意等銜名末題集賢院侍制張少悌
書張如意結銜稱寧遠將軍行左驍衛平陽郡冀城府
右果毅都尉冀城府見唐書地理志

逍遙樓三大字

大厯五年正月

右逍遙樓三大字在臨桂縣旁題大厯五年正月一日
顏真卿書案顏魯公文集載公行狀大厯三年遷撫州

刺史七年九月拜湖州刺史生平未嘗至桂州此三字不知何時何人所摹其詳不可考矣

麻姑山仙壇記

大厯六年四月

石麻姑山仙壇記在南城縣顏魯公書小字本記稱開元中道士鄧紫陽於此習道蒙召入大同殿修功德魯公元靖先生碑元宗欲受三洞真經於大同殿潔修其事正與此同記云自麻姑發迹於茲嶺南真遺壇於龜源花姑表異於井山今女道士黎瓊仙年八十而容色益少曾妙行夢瓊仙而食花絕粒魯公文集中有南嶽魏夫人仙壇碑華姑仙壇碑皆紀其事

無憂王寺大聖眞身塔銘

大厯十三年四月

右無憂王寺大聖眞身塔銘在扶風縣碑云在少尹時
則有若檢校刑部員外郎兼侍御史張公增少尹檢校
司勳員外郎兼侍御史王公鴻漸贈揚州大都督段行
琛碑是張增書結銜稱朝請郎檢校尚書刑部員外郎
兼鳳翔少尹侍御史與此碑同元和姓纂左司郎中王
鴻漸貝州人

浯溪詩

右浯溪詩在祁陽縣詩云次山有文章可惋只在碎然
長於指敘約潔多餘態心語適相應出句多分外於諸
作者間拔戟成一隊中行雖富劇粹美君可蓋子昂感
遇佳未若君雅裁退之全而神上與千年對李杜才海

翻高下非可槩文於一氣間爲物莫與大先王路不荒
豈不仰吾輩石屏立衙衙溪口啼素瀨我思何人知徒
倚如有賴末題侍御史內供奉皇甫湜容齋隨筆載此
詩啼作揚賴作待陸放翁跋皇甫先生文集云右一詩
在浯溪中興頌旁持正集中無詩詩見於世者此一篇
耳然自是傑作近時有容齋隨筆亦載此詩乃云風格
殊無可采人之所見恐不應如此或是傳寫誤爾

左武衛中郎將石暎墓誌銘

右左武衛中郎將石暎墓誌銘在長安縣誌稱暎字先
進其先樂安人後世家於京兆今則京兆人祖名闕考
守珍皆公侯繼業鍾鼎傳門不書其官職暎以方事之

殷燿火不息率先義勇累遷至左武衛中郎將以歲次十一月十四日遘疾終於私第歲次甲子四月庚午葬於長安龍首原皆不書其年號不知爲何時人今姑附於大厯之後不佞不求求作悵亦僅見

舜廟碑

建中元年

右舜廟碑在臨桂縣韓雲卿撰韓秀實書李陽冰篆額碑高三丈餘李工部秉綬搨以贈予碑字多殘毀尙有大厯十一年皇族隴西縣男兼御史中丞昌□□□地虔祇統命肅翼神寺等字可辨寶刻叢編靜江府有平蠻頌稱大厯十一年賊帥潘長安僞稱南安王誘脅夷蠻連跨州邑天子命隴西縣男呂巖持節招討禽獲

元惡與此碑合則此碑昌下闕者是巉字也新唐書宗
室世系表荆南節度使檢校工部尙書昌巉不言桂管
者略也平蠻頌亦韓雲卿撰韓秀實書李陽冰篆額大
厯十二年立屢求不得俟更訪之

獨秀山新開石室記

建中元年八月

右獨秀山新開石室記在臨桂縣諸家皆未著錄前題
監察御史裏行鄭叔齊略云城之西北維有山曰獨秀
大厯中御史中丞隴西公保鄣南服三年政成迺考宣
尼廟於山下得茲穴焉隴西公者李昌巉也結銜與舜
廟碑同

涇王妃韋氏墓誌銘

建中三年二月

右涇王妃韋氏墓誌銘在咸陽縣誌稱妃姓韋氏京兆長安人祖湜皇朝中散大夫潁王府司馬贈光祿卿父昭訓皇朝中散大夫太子僕贈衛尉卿新唐書宰相世系表湜齊州刺史昭訓太子僕與此同誌載妃行蹟甚略稱位則千乘小君行則一人猶母雖貴無壽享年四十八以建中二年十二月己酉薨於寢新唐書涇王僉肅宗子張美人生始王東陽進王涇興元元年薨是妃薨後三年王亦薨矣

秘書省著作郎韋端玄堂誌

貞元六年

右秘書省著作郎韋端玄堂誌在長安縣誌稱公諱端字正禮五代祖孝寬後周大司空鄭襄公高祖津隋民

部尙書曾祖琬皇成州刺史贈禮部尙書祖季弼太僕
寺主簿烈考廉尙書庫部郎中端卽郎中第二子皆與
新唐書宰相世系表合端歷率更寺主簿下邳縣主簿
下邳陽翟二縣丞國子監主簿凡五仕以子縝爲工部
郎中拜朝散大夫秘書省著作郎致仕子五人縝工部
郎中系陽翟縣尉練鄉貢進士紆兼殿中侍御史絢前
太廟齋郎表端子止縝紆二人而不及系練絢皆可補
史之闕誌卽第四子紆撰書墓誌稱玄堂誌亦變例

清河張夫人墓誌銘

貞元八年五月

右清河張夫人墓誌銘在長安縣誌稱夫人號威德嬪
於閭氏貞元八年二月廿八日終於京長安縣義寧里

之私第春秋六十有九嗣子庭萼右龍武軍宿衛次子庭珍右羽林軍宿衛邠州節使尙書張獻甫奏赴行營遂忠於國孝不並行當是歿於陣也新唐書張獻甫附見張守珪傳檢校工部尙書貞元四年代韓游瓌領邠寧節度使

宣州司功叅軍魏邈墓誌銘

元和十年四月

右宣州司功叅軍魏邈墓誌銘在咸寧縣誌爲其子匡贊所撰兼書邈以貞元初射策不第爲河陽節度使所辟隨逐戎幕奏授懷州叅軍復爲果州司戶叅軍元和四年四月相府裴公知其善補待制官拜婺州司功叅軍轉宣州司功叅軍以其年十月十三日終於宣州宣

城縣之公館新唐書宰相表元和三年九月丙申戶部侍郎裴均守中書侍郎同中書門下平章事五年十一月庚申均罷爲兵部尙書所謂相府裴公者當是均也

湏陽果業寺開東嶺洞谷銘

元和十一年十二月

右湏陽果業寺開東嶺洞谷銘在英德縣前題河南元傑口長夫撰元和郡縣志湏陽縣屬廣州果業寺卽今南山聖壽寺文稱元和丙申歲秋八月余以膠鬲之困寓居精舍再從兄昭肅時假茲邑政便於人務亦多暇與當寺僧智捷日探道源云云王象之輿地紀勝陳思寶刻叢編並載此銘

龍花寺大德韋和尚墓誌銘

元和十三年七月

右龍花寺大德韋和尚墓誌銘在長安縣誌題從父弟鄉貢進士同翊撰誌稱大德姓韋氏法號契義曾王父諱安石皇尚書左僕射中書令大父諱斌皇中書舍人臨汝郡太守烈考諱袞皇司門郎中眉州刺史新唐書安石斌俱有傳宰相世系表斌臨安太守袞駕部員外郎同翊爲斌孫逢之子字啟之皆與誌合臨汝作臨安是表傳刻之譌斌本傳亦作臨汝

龍花寺尊勝陁羅尼經幢

元和十三年七月

右龍花寺尊勝陁羅尼經幢在長安縣末有記稱比丘尼大德諱契義俗姓韋氏常修常寺彌勒閣并閣下大像云云題從祖弟朝議郎守都水使者上柱國同元撰

宰相世系表安石子陟吏部尙書郇國公陟子允吏部員外郎允子同元與同翊爲從祖兄弟據記大德契義是比丘尼而前誌稱韋和尙是亦奇也

宮闈令西門珍墓誌銘

元和十三年七月

右宮闈令西門珍墓誌銘在長安縣珍父進朝議郎行內給事賜緋魚袋新唐書宦者列傳有西門季玄西門匡範西門重遂內官蓋其族世職也誌稱建中四年涇源叛卒晝入犯門鑾輿西巡以避封豕時懷光不臣潛與泚合翠華於是更幸梁洋德宗紀幸梁州在興元元年二月丁卯誌又云貞元元年改充豪壽觀察監軍判官尋除張建封爲徐泗節度詔公獨監送上職名如故

方鎮表貞元四年置徐泗濠三州節度使治徐州是時
豪壽并於徐泗以張建封領之故珍仍監其軍又云元
和元年改充十王宅使十一宗諸子傳聞元後皇子幼
多居禁內既長詔附苑城爲大宮分院而處號十王宅
所謂慶忠棣鄂榮光儀潁承延盛濟等王以十舉全數
也中人押之誌當撰於元和元年預營宅兆之時故七
年以後遷官并卒葬年月書於銘詞之後亦是一例

太子洗馬崔載墓誌銘

元和十四年十一月

右太子洗馬崔載墓誌銘在大興縣葉東卿學錄所贈
誌題承務郎試蜀王府叅軍成表微撰載王父謙皇易
州修政府折衝新唐書地理志易州府九有修武而無

修政疑武卽政譌列考季試恆王府司馬恆王瑱元宗
子從帝幸蜀代宗時薨載伯仲五人皆美鬚鬣麗容貌
各身長六尺二寸名位不甚顯俱不見於史

鳳州司倉叅軍夫人孫氏墓誌銘

元和十五年十一月

右鳳州司倉叅軍夫人孫氏墓誌銘在長安縣誌稱夫
人字靜堅建業人及笄年適於司馬司倉宗司馬宗者
其夫姓名司倉者其官名也元和十五年五月十六日
終於長安頒政甲第誌前題前翼王府叅軍賈中立撰
翼王綽順宗子咸通三年薨

中書令張九齡碑

長慶三年七月

右中書令張九齡碑在曲江縣張文獻墓前寶刻叢編

再續一卷

三

唐廣州刺史嶺南節度使徐浩撰并書長慶三年刻石此則宋天聖八年知韶州刁湜重刻本也文多剝泐新唐書宰相世系表九齡孫藏器長水丞碑作孫藏器河南府壽安尉碑云侍御史抗以兄拯早世姪藏器幼孤□□抗卽九齡弟九臯子也唐碑書虎字皆缺筆或改字碑云三虎爲榮當是宋重刻時所改

遊石室新記

寶曆元年九月

右遊石室新記在高要縣文左行略云高要縣北十五里有石室東西倚山之陽西通於上武林東抵於零羊峽寶曆元年秋九月二十日攝經略巡官試大理評事權知軍州務事賜緋魚袋博陵崔公領寮屬及將吏遊

於茲室化清時守司馬得陪盛遊輒敘鄙詞紀乎前事
云云後有崔獻直王化清等銜名元和郡縣志開元二
十一年又於邊境置節度經略使廣州爲嶺南五府經
略使理所權知端州軍事而稱攝經略巡官者其帶銜
也郡縣志零羊峽在高要縣東水行三十里

大悲陁羅尼幢

寶曆二年十二月

右大悲陁羅尼幢在南海縣光孝寺文左行末題同經
略副使前守辰州都督府鑒博士盧江郡何宥則敬爲
亡兄節度隨軍文林郎守康州司馬宥卿造此大悲陁
羅幢新唐書地理志辰州都督府屬黔中採訪使康州
屬嶺南採訪使

李渤留別南溪詩

太和二年十一月

右李渤留別南溪詩在臨桂縣李渤新唐書有傳寶刻叢編有新開隱山六洞記引集古錄曰云李渤遊于州之南山其溪谷潭洞皆人所未嘗至者遂名之曰隱山構亭榭於其上卽此所謂南溪也碑末題太和二年十一月十三日有大宋紹興二十年季夏張仲宗鄧宏重命工刊整字太和當作大和今作太是重刊之譌

內供奉瞿空和上塔銘

太和七年八月

右內供奉瞿空和上塔銘在長安縣誌稱法師諱瞿空姓任氏年八歲心已嚮佛授經惠雲卒學景鸞朝廷詔法師與天竺三藏譯口波羅密經以貞元十年正月十

五日卒於興唐寺銘爲大和七年八月五日比丘智亮等所建誌前題正議大夫守秘書監上柱國琅琊縣開國公食邑一千五百戶賜紫金魚袋王申伯撰新唐書宰相世系表琅琊王氏有申伯不著其官可據誌補之玉篇詁俗辯字

上柱國趙公夫人夏侯氏墓誌銘

開成五年十一月

右上柱國趙公夫人夏侯氏墓誌銘在襄陽縣誌稱夫人之先譙郡人後移貫深州樂壽縣曾祖諱載滄州長史祖諱璀試太子詹事滄景節度都押衙考諱萼試太常卿充冀州南宮鎮遏兵馬使新唐書百官志上鎮中鎮下鎮各有將一人鎮副二人每鎮又有使一人副使

一人此稱鎮遏兵馬使其卽鎮使歟夫人以開成五年六月廿六日遘疾終於襄陽縣明義里之私第襄陽爲襄州望縣誌前結銜稱唐山南東道節度總管襄州卽山南東道節度治所也

內府局丞王守琦墓誌銘

大中四年正月

右內府局丞王守琦墓誌銘在長安縣陸劭文孝廉所贈守琦父意通充內酒坊使守琦貞元十二年入仕大中三年退居私第因寢疾崩於歲十二月十五日誌題將仕郎試右監門率府錄事叅軍劉景夫述寫作營謝作榭後作後嗣作嗣怨作怨班作班皆異文

榮王府長史程修己墓誌銘

咸通四年四月

右榮王府長史程修已墓誌銘在長安縣修已字景立以善畫得名朱景玄唐朝名畫錄有程修已與誌所載少異名畫錄稱修已冀州人祖大厯中仕越州醫博士父伯儀少有文學畫東封圖爲時所寶誌稱祖鳳發州文學父儀蘇州醫博士不言其善畫誌稱修已幼通左氏春秋舉孝廉來京師游公卿名人間大和中陳丞相言於昭獻授浮梁尉賜緋魚袋直集賢殿累遷至太子中舍凡七爲王府長史陳丞相名夷行昭獻文宗尊號新唐書百官志開元十三年改麗正修書院爲集賢殿書院其後又置畫直至十九年以書直畫直搨書有官者爲直院故誌前結銜稱唐故集賢直院官誌又稱上

又令作竹障數十幅因自爲詩命翰林學士等和之盛傳於世又畫毛詩疏圖藏於內府名畫錄皆詳載其事

龍興觀道德經

景福二年七月

右龍興觀道德經在易州文甚摩滅末題唐景福二祀歲次癸丑□□中元日又有易定節度及銀青光祿大夫檢校右散騎常侍御史大夫上柱國王等字可辨錢辛楣少詹以爲王處存爲節度日所刻李克用中和五年題名稱易定節度檢校司空王處存結銜與此正同元和郡縣志易定節度使管州二定州易州方鎮表建中三年置義武軍不言領易定者當是史脫文也

五代

少林寺主法華鈞大德塔銘

同光四年三月

右少林寺主法華鈞大德塔銘在登封縣文稱大德法
諱行鈞俗姓閻氏鄭州陽武人始依會善寺西法院素
禪師爲和尚卜居石城山廣明庚子歲住少林寺葺修
大殿首尾三載而遇釋門澄汰遂從毀廢此在會昌勅
廢之後憫忠寺重修舍利塔記中和□年歲在壬寅燕
□淘汰空侶事與此近

尊勝陀羅尼幢

乾和三年三月

右尊勝陀羅尼幢在博羅縣寶積寺字畫磨滅不甚可
辨未有乾和三年太歲乙巳三月八日丙寅□□亡考
陳十八郎敬贖造加□佛頂尊□陀羅尼幢一座追薦

幽途胡誤物并乞自身□□□□□長於羅浮□□□
禪院供養設齋慶讚訖等字

勅留啟母少姨廟記

顯德五年七月

右勅留啟母少姨廟記在偃師縣舊五代史周世宗紀
顯德二年四月詔諸道州府縣鎮村坊應有勅額寺院
一切仍舊其無勅額者並抑停廢啟母少姨廟在緱氏
縣唐興鄉皇甫村附以濟瀆祠宇一所邑令劉煥上請
因以得留鄉貢進士許中孚撰此記楊炯少室山少姨
廟碑云少姨廟者則漢書地理志嵩高少室之廟其神
爲婦人像者則故老相傳云啟母塗山之妹也

讀碑記再續一卷終